

RADNIČKA KLASA I KPJ U BORBI ZA SOCIJALIZAM U BOSNI I HERCEGOVINI (Naučni skup održan u Sarajevu 6. i 7. 11. 1969. godine)

Povodom 50-godišnjice Saveza komunista Jugoslavije, Akademija nauka i umjetnosti Bosne i Hercegovine u saradnji sa Institutom za istoriju radničkog pokreta i Univerzitetom u Sarajevu organizovala je 6. i 7. novembra 1969. naučni skup na temu »Radnička klasa i KPJ u borbi za socijalizam u Bosni i Hercegovini.«

Na skupu je podneseno 13 referata u kojima je razmatrano niz pitanja specifičnih za cjelokupno društvo, radničku klasu i KPJ u Bosni i Hercegovini u proteklih 50 godina. Rezultate svojih istraživanja najnovije prošlosti Bosne i Hercegovine saopštili su: Rodoljub Čolaković, Neki problemi izučavanja uloge KPJ u istoriji naroda Bosne i Hercegovine; Avdo Humo, Komunistička partija Jugoslavije i nacionalno pitanje; Anto Babić, Odnosi Srba, Hrvata i Muslimana prema KPJ i revoluciji; Milivoje Erić, Olga Kozomara i Kemal Hrelja, Strukturalna kretanja i promjene u bosansko-hercegovačkom društvu u posljednjih 50 godina; Franc Cengle, Marksistička misao u Bosni i Hercegovini; Nikola Babić, Doprinos radničkog pokreta u Bosni i Hercegovini stvaranju jedinstvenog jugoslovenskog radničkog pokreta; Ibrahim Karabegović, Rascjep u bosansko-hercegovačkom radničkom pokretu 1919—1921. i posljedice rascjepa; Ahmed Hadžirović, Sindikati i djelovanje KPJ u Bosni i Hercegovini; Moni Finoi, Djelovanje KPJ u kulturnim i sportskim društvima i organizacijama između dva rata u Bosni i Hercegovini; Mitar Papić, Građanska štampa prema KPJ u Bosni i Hercegovini; Nevenka Bajić, Značaj etičkog faktora u ustanku 1941. godine; Haso Hadžiomerović, Privreda Bosne i Hercegovine kao integralni dio jugoslovenske privrede; Zoran Vidaković, Društvena baza samoupravljanja.

Ovaj naučni skup značajan je ne samo sa stanovišta proučavanja istorije radničke klase i KPJ u Bosni i Hercegovini nego i sa stanovišta čitave društvene istorije u ovoj zemlji. Ovaj značaj proizilazi iz dva osnovna razloga: prvo, što su pojedina pitanja razmatrana sa više slobode, kritičnosti i originalnosti (na primjer: uticaj konfesionalnog faktora na formiranje političkog mišljenja (A. Babić), oslobođenje od uticaja vojne istoriografije koja usko sagledava društvenu bazu ustanka, te šire i određenije tretiranje uloge KPJ i pojedinih društvenih slojeva u ustanku i revoluciji (R. Čolaković), suština nacionalno-konfesionalnih odnosa i pitanje jugoslovenstva (A. Humo) i, drugo, što je program skupa bio zasnovan na široj tematskoj osnovi koja sadrži osnovne elemente teoretske i praktične djelatnosti radničke klase i KPJ u bosansko-hercegovačkom društvu, obogaćujući time našu istoriografiju novim činjenicama i pogledima.

Materijali sa ovog naučnog skupa biće objavljeni u časopisu *Radovi Akademije nauka i umjetnosti Bosne i Hercegovine*.

I. HADŽIBEGOVIĆ